

石志卷之一百

石志三

金石三洛

商丁舉爵

佚

薛尚功鍾鼎款識傳古云王玠得古爵於洛而

名之曰丁舉字畫古拙丁亦商君之號其爲商器無疑

周廟金人銘

佚

家語孔子觀周入后稷之廟有金人焉三緘

其口而銘其背顧謂弟子曰小子識之此言實而中情而

信

按劉勰文心雕龍曰周公慎言於金人則此銘周公所作也路史黃帝以惟口起兵惟動得吝乃爲金人三緘其口而銘之注引太公金匱公對武王之言明黃帝所作皇覽記引陰謀黃帝金人器銘曰武王問尙父五帝

之戒對曰黃帝之戒曰吾之居民上也播播恐朝不及夕故爲金人三封其口曰古之慎言人也當以家語爲正

周雝公鼎銘

佚

廣川書跋此鼎制甚大按以今太府權量爲

斤若干其容若干銘曰惟十有四月旣死霸王在下都雝公誠作尊鼎原父以丁爲寧其說是也周旣都洛而以成周爲下宮所以異宗周也誠周古史考曰周公營作下都則今洛陽何休曰周赧王所都也其曰十四月者蔡君謨嘗疑之此蓋自王之卽位通數其月爾或謂周之十四月爲夏之二月元命苞曰夏以十三月爲正故管子有十三月令人之魯二十四月魯梁之民歸齊二十八月萊莒之

君請復之語如此自是古人書時不必月嗣君未改年以月數計之邢子才曰四十二月之科一依恒式彼自其君卽位後以月爲數其時則已再改年矣蓋循用古制服制小傳盡書以月此正未成君之制故昔人謂時王未改年者其說得之

周季嬪鼎銘

佚

宣和博古圖銘云正月王在成周徙于楚麓

命小臣夔先見楚居王至于徙居廡遺小臣夔錫貝錫馬

兩夔拜稽首對揚王休用作季嬪寶尊彝

嬪通作姁

周邢敦銘

佚

呂大臨考古圖銘曰維二年正月初吉王在周

邵昭

或作昭

宮丁亥格于宣射毛伯內門立中庭右祝邢王呼

內史册命邾王曰邾昔先王既命汝作邑繼五邑祝今
亂南乃命錫汝赤芾同冕齊黃鑾旗用事邾拜稽首敢對
揚天子休命邾用作朕皇考龔伯尊敦邾其眉壽萬年無
疆子子孫孫永寶用享

按宣射卽宣榭春秋記成周宣榭蓋宣王之廟也此
銘薛尚功釋作邾劉原父釋作毛伯考古圖從薛

周敦敦銘

佚

博古圖

銘曰維王十月王在成周南淮節趨及

內伐浪鼻參怕裕敏陰陽洛王命敦追迎于上洛慇谷至
于伊班長榜敦首百執侯曰雜乎入三百鄙于艾伯之廝
于慇衣誦復付乃君維王十有一月王格于成周太廟武
公入佑敦告禽馘百侯曰王蔑敦歷事尹氏受釐敦圭高

幣月五十朋錫田于欽五十田于早五十田欽敢對揚天

子休用作尊敦欽其萬年子子孫孫永寶用

按徐敏忠云此文與周商之書同辭興雅頌之詩同意蓋敦有執訊獲俘之功而殷之玉告廟受厘之後而錫之圭幣土內者如此其云南淮節逕及內成昂參蓋淮夷內伐將于昂參之墟謂西方也豈宣王世淮戎竝興之日耶王命敦逕迎于止洛愬谷至于伊蓋禦敵之師自西而及于洛中也自時難俘三百人而百執侯曰乃其首事者也于愬衣飾復付乃君蓋自愬谷已誦聞其事而復以所侯付于君也故王至自周太廟而受之宜其銘諸金石以揚天子休命也○玉海欽作欽

古盤銘

佚

廣川書跋

得之河南鞏氏其銘為舉蓋舉而進之

此其義也朴質不飾有足以永此殆古之世盤也匪以注水承水於盤不使水散於地尊者之所用也

按左傳懷嬴奉匱沃盥則匱以盛水侍者奉以沃盥而
以盤承其下也內則敦牟匱匱非飲宴故用鄭氏謂匱
匱酒器器匱以盛酒匱以盛漿是匱又食器也蓋三代
之器言舉者多矣匱為舉下匱為舉周鼎為舉檀弓
杜菁揚解謂之杜舉凡器之可舉而迎者皆
得名之故河南鞏氏所存古盤其銘為舉也

周世王名號碑佚冰經注周山有三王陵陵東有石碑錄畝

王以山世王名號之碑記周墓明矣

漢蕭何碑佚（通志金石略）西京有蕭何碑折作兩段

漢丞相長史朱賁臣墓銘
黃叔璥金石攷
東封之歲洛陽

平御路北市東南隅得石廼漢丞相長史朱買臣墓誌銘

按水經注臨淄人發古塚得銅棺前和外隱起為隸字
言齊太公六世孫胡公之棺是墓中有誌之始而無誌
之名也漢夏侯嬰得佳城銘世無知者惟博士叔孫通
能讀其文以為村斗書然銘詞云三十年見即自孝

惠時上推三千年當在洪荒之世蓋未有書契安得有銘未可謂墓銘之起遠自上古也廣川書跋曰墓之有銘在漢則杜鄴甄豐然樹之於外其後如繆襲輩刻官代綱之壙中皆在永建後原刻銘墓中不知何時而於所見者永城冢石最先他銘誌得之潘昂霄金石例曰事祖廣記引矢穀子齊王儉云石誌不出禮典起宋元嘉中顏延之爲王琳作石誌以其銘諫故以紀行自爾遂相祖習然魏侍中繆襲改葬父母制墓下埋文將以陵谷遷變欲後人有所聞知但記姓名歷官祖父姻媾而已有德業則爲銘文又隋代醴家於王戎墓得銘云晉司徒安豐元公王君之銘有數百字則魏晉已有其事不起于宋也馮鑑續事始云按西京雜記前漢杜子春一作杜好夏臨終作文命刻石埋于墓前恐墓誌因此始也據是則漢人已有墓誌但河南舊志所載得漢朱買臣墓誌銘今石既無存銘亦不傳恐舊志失寔金石攷不能辨其真僞耳

漢董宣廟碑

存

弇州山人藁碑前有四字篆書漢董宣傳傳

作中楷結法俱精雅有方圓意而不具人姓名當是唐能

書者書之也

金石補遺碑漢董宣傳八分書無年月在

洛陽董公祠內

按漢董宣傳四字篆書非分書現在府城東門內董公祠

漢橋元碑一金石攷在洛陽

按橋元碑據水經注在睢陽縣橋元墓前有三碑又據通志金石略橋元二碑入南京俱不言洛陽金石攷以爲在洛陽者蓋因元官洛陽左尉而誤耳

漢交趾都尉胡夫人黃氏神語

佚

金石攷語一作誥建寧二

年蔡邕撰文云太夫人年九十一薨於太傅府是月辛酉公之季子陳留太守碩卒於雒陽左池里舍十月旣望粵翌日塋於雒陽東界關亭之阿濟陽故吏舊民中常侍勾

陽于肅等二十三人思德慕化推本議銘著斯碑石是爲神語

漢胡公二碑

佚

金石攷洛陽有陳留太守胡公二碑建寧二

年蔡邕撰

漢司空殘碑

佚

金石錄漢司空殘碑政和乙未歲得於洛陽

天津橋之故基首尾已不完所存四十五字字畫奇偉其

詞有云命爾司空余回爾輔據此乃嘗爲二公惜其不見

名氏也碑陰有故吏題名百餘人尤完好筆法不減蔡邕

石經云

隸續司空碑存五行行九字皆銘詩也字徑二

寸餘雄健清新蓋漢法之神器

漢洛陽宮殿門題

佚

水經注

漢世洛陽宮殿門題多是大篆

言是蔡邕諸子自董卓焚宮殿魏太祖平荊州漢吏部尙書安定梁孟皇善師宜官八分體求以贖死太祖善其法常愛翫之以爲勝宜官北宮榜題咸是鵠筆南宮旣建明帝令侍中京兆韋誕以古篆書之皇都遷洛始令中書舍人沈含馨以隸書書之景明正始之年又敕符籙令江式以大篆易之今諸桁榜題皆是式書

漢洛陽橋石柱銘

佚

水經注

洛陽建春門右橋建兩石柱橋

之右柱銘曰陽嘉四年乙酉壬申使中謁者魏郡清淵馬憲監作石橋梁柱

漢儒鼎文

佚

鼎錄靈帝熹平元年鑄一大鼎埋之鴻都門其

文曰儒鼎古書

漢五君栢梓文

佚

東觀餘論在洛陽上清宮

隸續黃長睿

作洛陽九詠其瞻上清一篇中云寢梓五分石栢九饗西
后兮殿東后注云宮中有石上列圓穴五橢穴九俗謂之
九卵石側各有題記曰太老君真人君仙人君東海君西
海君字與漢人隸法同宣和殿藏碑錄以爲漢碑而名之
曰真人君石樽刻與四老神祚機刻石同帙其文惟太老
君三字最大蓋尊老子也西海君六字却似晉人筆札豈
鐫刻有工拙乎

漢太尉劉寬二碑

伏

集古錄漢太尉劉寬碑有二一故吏李

謙立一門生商苞立題名在故吏所立之碑陰其別列於

後者在竇子松之碑陰也寬以漢中平二年卒至唐咸亨

元年其裔孫湖城公爽以碑歲久皆仆於野爲再立之并

記其世序

金石錄

漢太尉劉寬有二碑此碑據藝文類

聚乃桓麟撰後碑不知何人所爲然字體則同也

東觀

餘論在上東門外官道北洛陽尉射圃中近世近事者亭

以覆之自其亭爲寶刻蓋以是碑爲蔡中郎書故名焉二

碑陰各有題名予徘徊碑下想文饒之高風玩中郎之妙

楷與歐陽信本觀索靖書碑坐卧不能去何以異云

漢

隸字源劉寬後碑在西京洛陽縣與前碑文亦相犯門生
商苞作

漢劉寬神道

佚

隸續劉寬神道二碑其一曰漢太尉劉公諱

寬字文饒其一曰漢太尉車騎將軍特進昭烈侯劉公神
道字法與正碑相類自昔訪石刻者惟知上東門外門生
故吏兩碑耳俱不知更有此碑碑圖云劉寬神道二刻隸
字各一行其上皆有螭左右相向其下有一獸之面兩旁
頗不具

漢大石嶺山堂碑

佚

水經注大石嶺開山圖所謂大石山也

山下有大石嶺碑河南隱士通明以靈帝中平六年八

戊辰於山堂立碑文字淺鄙始不可尋山在洛陽南而劉澄之言在洛東北非也

魏典論六碑

佚

魏志文帝作典論明帝立詔三公曰先帝昔

著典論不朽之格言其刻石於廟門之外及太廟與石經並以永示來世

魏曹真祠堂碑

佚

述征記曹真祠堂在北邙山刊石既精書

亦甚工

魏太妃郭氏碑

佚

通志金石略正元二年在西京

魏三斷碑

佚

通志金石略碑皆漫滅二碑無字在西京

晉辟雍行禮碑

佚

金石攷太始二年在洛陽

晉千金渠石人脇下文

佚

水經注語林曰陳協數進阮步兵

酒後晉文王欲修九龍堰阮舉協文王用之掘地得古承
水銅龍六枚堰遂成水歷竭東注謂之千金渠逮于晉世
大水暴注溝瀆泄壤又廣功焉石人東脇下文云云太始
七年西脇下亦有文

晉金像菩薩銘

佚

伽藍記宜壽里段暉宅地下常有光掘光

所得金像一軀可高三尺有二菩薩跌坐上銘云晉太始
二年五月十五日侍中中書令荀勗造

按古人墓誌銘有有誌無銘者但曰墓誌亦有無銘而
亦曰墓誌銘者或以誌後散文用韻爲銘或散文全不
用韻亦得爲銘各體脩昌黎文集今攷金像文十八
字但記年月與造像姓名別無銘詞而曰銘蓋古人

題有自
來矣

晉太原寺塋浮圖石銘

佚

伽藍記銘云晉太康六年歲次乙

巳九月甲戌朔八日辛巳儀同三司襄陽侯王濬敬造

晉王大令桓山碑

佚

絳帖

王大令殘碑桓山頌獻之銘六字

梁天福元年雒陽修城得之土中考其事或是永初十二年秋桓溫破姚襄事此碑碎裂不全止存此六字耳

晉王司徒墓銘

佚

見聞記東都殖業坊十字街有王戎墓隋

時釀酒家穿其旁作窖得銘有晉司徒尙書令安豐侯王君數百字廣川書跋南朝王戎墓銘凡數百言其首書晉司徒尙書令安豐元公之銘

後魏苗茨碑伏 戒碑惟存數十字

後魏苗茨碑

伏

伽藍記

柰林南有石碑一所魏明帝所立也

題云苗茨之碑高祖於碑北作苗茨堂永安中年莊帝馬射於華林園百官皆來讀碑疑苗字誤國子博士李同軌曰魏明英才世稱三祖公幹仲宣爲其羽翼但未知本意如何不得言誤也銜之時爲奉朝請因卽釋曰以蒿覆之故言苗茨何誤之有衆咸稱善

後魏千金塢石人銘

伏

洛陽記

千金塢舊堰穀水魏時更修

此堰積石爲塢而開溝渠五所謂之五龍渠渠上立塢塢之東首立一石人腹上刻勒云太和五年二月八日庚戌